

Ngā Marau e Marohitia ana mō Te Marautanga o Aotearoa

Puka kōrerorero



Ngā Marau e Marohitia ana mō Te Marautanga o Aotearoa

Hei wāhanga o te Hōtaka Panoni NCEA, kei te whakahaere Te Tāhuhu o te Mātauranga i te tūhononga tūmatanui e pā ana ki ngā panoni e marohitia ana ki *Te Marautanga o Aotearoa*.

Kei te āwhina ngā panoni e marohitia ana ki raro nei ki te whakatinana i te moemoeā o te Rūnanga Kāwanatanga kia whakaaturia e te NCEA te Mana ōrite mō te mātauranga Māori, ā, kia tū Taumata 1 hei tohu whānui, paparahi hoki me ngā ara kia nui ake te aro whāiti me te ako hōhonu ki Taumata 2 me te 3.

Mā ō kōrero whakahoki mātou e āwhina ki te whakatūturu mēnā rānei he āhuatanga o ngā marau tārewa me aro anō. Mā te Tāhuhu ngā whakatau whakamutunga mō ngā marau mō *Te Marautanga o Aotearoa* hei te wāhanga whakamutunga o tēnei tau i runga i te tirohanga torowhānui o ngā whai whakaaro tae atu ki te whakahoki kōrero a te iwi whānui me ngā pānga o ērā atu whakaarotau a te Tāhuhu ka pā ki ngā kura tuarua, ki ngā kura hoki pērā i te Reform of Vocational Education.

Ina whakaaetia ka ahu whakamua ngā marau, ka whakamahia ētahi atu anō mahi hei whakatūturu i te wātaka whakawhanaketanga mō ia marau. E whai ana mātou kia tū te nuinga o ngā panoni marau ki ngā kura hei te tau 2024 (Taumata 1 me 2), hei te 2025 rānei (Taumata 3). Ka roa ake pea ngā wātaka whakawhanaketanga mō ētahi marau hou. Kei te whakaatu tēnei i te āheitanga o te Tāhuhu ki te tuku rauemi ki te mahi whakawhanaketanga e hiahiatia ana, te noho rite o ēnei marau mō te whakawhanaketanga me te whakatinanatanga, me te āheitanga o te rāngai hei whakahaere panoni atu anō i tērā kei te hiahiatia kētia hei whakatinana i ngā panoni ki ngā marau o nāiane. Ko tā Te Tāhuhu kawatau kia tuku whaikupu mō ngā marau whakamutunga ā te Hepetema 2021, me te tūtohu hoki i te wātaka mō ngā marau kē atu e waihangatia tonutia.

Ka tukuna e ia marau e marohitia ana ngā paerewa paetae e whā ki ia Taumata o NCEA, e rua ngā paerewa ā-roto, e rua ngā paerewa ā-waho.

He aha ngā marau e marohitia ana mō Te Marautanga o Aotearoa?

I te Taumata 1:

» **HOU – Te Reo Pākehā (ki Te Reo Pākehā)**

I Te Reo Pākehā, ka ako ngā ākonga i te reo Pākehā hei reo tuarua i runga i tētahi tirohanga ao Māori motuhake. Mā reira rātou e whiwhi ai i ngā pūkenga e hiahiatia ana kia māia te rapu ara me te whakawhiti kōrero ki te ao Pākehā.

» **Te Reo Rangatira (ki Te Reo Māori)**

I Te Reo Rangatira, ka torohē, ka mārāma, ka whakawhanake, ka whakapuaki ngā ākonga i ō rātou akoranga ki te reo Māori mā te ao Māori. Mā reira rātou e whiwhi ai i ngā pūkenga reo Māori mō te whānuitanga o ngā take whakawhiti kōrero, mātauranga hoki.

» **Pāngarau (ki Pāngarau)**

I te Pāngarau, ka ako ngā ākonga i te pāngarau mā tētahi arotahi kaupapa Māori, reo Māori hoki, tae atu ki ngā Tau me te Taurangi, te Ine me te Āhuahanga, te Tauanga, me te Tuanaki.

» **Pūtaiao (ki Pūtaiao)**

I te Pūtaiao, ka tukuna ki ngā ākonga ngā ara hei whakauru i ngā tirohanga me te mātauranga Māori e pā ana ki te ao tūroa ki te akomanga. Kei roto nei ko te mātai i Te Ao Tūroa, i Ō Ahupūngao, i Ō Kawekawe, i Ngā Tautake Pūtaiao me Ngā Kōrero o Mua. Hei whakatairanga tēnei i te wānanga, i te tātaritanga whakapae i ngā ara kua whakamahia te pūtaiao hei tautoko i te whakatuanui o ngā tirohanga aro-Ūropi.

» **Hauora (ki Hauora)**

I te Hauora ka whai ara ngā ākonga ki te ako e pā ana ki te hauora me te oranga katoa o te wairua, te hinengaro, te tinana, te ngākau, tae atu hoki ki te hauora taiao. Ka whakawhanake rātou i te māramatanga mō te hauora mā te whakaatu, te whakamārama, te whakamātau, te arotake i ōna tini āhua.

» **Tikanga ā-Iwi (ki Tikanga ā-Iwi)**

I te Tikanga-ā-Iwi, ka ako ngā ākonga i te pāpori me te āhuatanga tangata kia pai ake ai te mārāma ki tō rātou ake ao. Ka mātai rātou i ngā tikanga, i ngā ritenga, tae atu ki te pāhekoheko o ēnei ki ō ngā tāngata hiahia ā-tinana, ā-pāpori, ā-ngākau, ā-wairua hoki.

» **Toi Ataata (ki Ngā Toi)**

I te Toi Ataata, ka ako ngā ākonga i ngā toi ataata mā ngā whenu o te tūhura, te mahi, te mōhiotanga, te maioha anō hoki.

» **Ngā Mahi a te Rēhia (ki Ngā Toi)**

I Ngā Mahi a te Rēhia, ka ako ngā ākonga i ngā toi whakaari mā ngā whenu o te tūhura, te mahi, te mōhiotanga, te maioha anō hoki.

» **Toi Puoro (ki Ngā Toi)**

I te Toi Puoro, ka ako ngā ākonga i ngā toi puoro mā ngā whenu o te tūhura, te mahi, te mōhiotanga, te maioha anō hoki.

» **Hangarau (ki Hangarau)**

I te Hangarau, ka arotahi ngā ākonga ki ngā uara, ngā pūkenga, ngā mātauranga hoki o tō rātou ake ao, tae atu hoki ki ērā i whakatauiratia e ngā tīpuna. Ka whakatūturu ō rātou wheako ako ki roto i tēnei Wāhanga Ako i tō te ākonga mātauranga, whakapapa hoki ki roto i tētahi pāpori ā-ao.

He aha ngā marau e marohitia ana mō Te Marautanga o Aotearoa?

I te Taumata 2:

- » **HOU – Mau Rākau (ki Ngā Toi)** I te Mau Rākau, ka ako ngā ākonga e pā ana ki te hītori, te toi me te whakamahinga o ngā rākau a te Māori, a ētahi atu iwi taketake hoki. Mā reira rātou e whiwhi ai i ngā pūkenga o te whakahaere whaiaro me te ārahitanga, me te whakapakari māramatanga mō ngā taikumekume ā-tangata, ā-wairua o ngā wero.
- » **HOU – Toi Whakairo (ki Ngā Toi)** I te Toi Whakairo, ka ako ngā ākonga e pā ana ki te hītori, te toi me te whakamahinga o ngā whakairo a te Māori, a ētahi atu iwi taketake hoki. Mā reira rātou e kaingākaunui ai ki ngā tikanga me te whakapapa haumako o te mahi toi.
- » **HOU – Tauhokohoko (ki Tikanga ā-Iwi)** I te Tauhokohoko, ka ako ngā ākonga i te whānui o te mātau ahumoni, tae atu ki te whakahāngai i tēnei mātauranga ki ngā horopaki o ia rā, me ngā momo kurutete rerekē ka whakamahia e ngā iwi ki te whakatū ōhanga.
- » **HOU – Te Hītori o Aotearoa (ki Tikanga ā-Iwi)** I Te Hītori o Aotearoa, ka titiro ngā ākonga ki te mātauranga Māori nō roto tonu i ngā hītori ā-iwi Māori o Aotearoa, i runga i ngā kōrero o mua o ngā whānau, ngā hapū, ngā iwi hoki.
- » **HOU – Hangarau Matihiko (ki Hangarau)** I te Hangarau Matihiko, ka ako ngā ākonga kia māia te tiki pūkenga, mātauranga o te ao Māori hei whakamahinga me ngā hoahoa matihiko o tēnei wā.
- » **HOU – Hākinakina (ki Hauora)** I te Hākinakina, ka ako ngā ākonga i te hītori me te whakamahinga o ngā hākinakina me ngā whakataetae Māori. Mā reira rātou e whiwhi ai i ngā pūkenga o te ārahitanga, te mahi tahi, te kiritau anō hoki ki tētahi horopaki ao Māori ariari.

He aha i pēnei ai ngā marau?

- » I mahi tahi mātou me te āwhina a te rāngai me ngā pūkenga marau ki roto i Te Tāhuhu ki te whakawhanake i ngā marau e marohitia ana, i te whakamahinga o ngā raraunga kua kohia mō te whakamahinga o te paerewa me te paerewa paetae anō hoki.

Whakaputaina mai ōu whakaaro



Tukua mai ō whakaaro

He aha ōu whakaaro mō ngā marau e marohitia ana ki *Te Marautanga o Aotearoa*?

He kōrero, he kōrero whakahoki āu?

Kei te tino hiahia mātou ki te rongu kōrero mai i a koe.

Tukua mai ō whakaaro

<https://consultation.education.govt.nz/ncea/whakapuakina-whakaaro-m-ng-marau-ncea-marohi> i mua i te paunga o te 13 o Ākuhata 2021.

Mō ētahi atu mōhiohio, toro atu ki

<https://ncea.education.govt.nz/have-your-say>

Īmēra mai rānei ki a mātou ki

TeMarautanga.oAotearoa@education.govt.nz

He aha ngā kaupapa matua e hiahiatia ai he whakahoki kōrero e te Manatū?

- » E whakaae ana koe kia tāpiritia he marau hou ki Taumata 2 me te 3 o *Te Marautanga o Aotearoa* hei āwhina i te whakaako me te ako ki ngā kura Māori (e tuku ana i te aro whāiti)?
- » Ko tēhea/ēhea o ngā marau hou e marohitia ana e pai ana ki a koe?
- » He āwangawanga ōu mō tētahi/ētahi o ngā marau hou e marohitia ana?
- » Kei te marohitia te Mau Rākau me te Toi Whakairo mō *Te Marautanga o Aotearoa* me *The New Zealand Curriculum* hoki. Ki ōu whakaaro me noho ēnei marau ki raro i tēhea/ēhea marautanga? Me noho ēnei ki raro i ngā marautanga e rua?
- » He aha atu ngā marau, mehemea ko tētahi/ētahi, ka taunakitia e koe kia whakaratoa ki roto i *Te Marautanga o Aotearoa*?
- » He whakaaro anō ōu kia tukuna mai ki a mātou mō ngā marau e marohitia ana mō *Te Marautanga o Aotearoa*?

We **shape** an **education** system that delivers
equitable and **excellent outcomes**

He mea **tārai** e mātou te **mātauranga**
kia **rangatira** ai, kia **mana taurite** ai ōna **huanga**